

**Igl meis da matg 2021 ò la suprastanza communal tracto
tranter oter igls affars suandonts:**

Immobiglias, fatgs da santieri e da sepultura, provedimaint d'ava

- Decidia da vender igl uriund local da pumpiers a Rona (parcella nr. 2071) ad en interessent, siva tgi igl inserat pertutgont la vendita è sto publitgia aint igls figls uffizials digl cumegn.
- Decidia da surdar la lavour d'installar igl nov sistem da direcziun pigl provedimaint d'ava alla firma Rittmeyer AG, Baar/ZG.

Fatgs generals, fatgs da persunal, economia e provedimaint d'energeia

- Delibero igl rendachint 2020 per mangs dalla radunanza communal.
- Delibero l'invitaziun cun la glista da tractandas ed igl messadi per la radunanza communal digls 21 da zarcladour 2021.
- Decidia da sottametter alla radunanza communal la proposta da conceder alla Fundaziun Piz Mitgel Val Surses ena contribuziun da promoziun unica da fr. 250'000.00 per sanar igl hotel Piz Mitgel.
- Approvo igl protocol dalla radunanza communal digls 10 da matg 2021 ed igl delibero per mangs dall'exposiziun publica da 30 deis.

Siertad publica e traffic

- Confermo alla Runals Beiva SA da veir nignas objecziuns cunter la prolunga dalla lubientscha da menaschi pigl runal Plan Büel-Camon (Tua) GR-BI-4. Igl Uffezi d'agricultura e geoinfurmaziun è responsabel per conceder la lubientscha da menaschi.
- Confermo alla Pendicularas Savognin SA da veir nignas objecziuns cunter la prolunga dalla lubientscha da menaschi per singuls runals existents. Igl Uffezi d'agricultura e geoinfurmaziun è responsabel per conceder la lubientscha da menaschi.
- Delibero igl sboz dalla lescha davart igl carar sen veias da prada, fons, gôt ed alps per mangs dalla radunanza communal digls 30 d'avost 2021.

Fatgs da construcziun, planificaziun digl territori e planisaziun locala

- Surdo las lavours da catram pertutgont igl passape e la farmada dalla posta Grava a Savognin all'interpresa Mettler Prader SA, Coira/Cunter.
- Decidia da desister da renaturar la veia naturala tgi è parallela alla veia d'equipaziun ainten la zona d'industria Punt a Cunter.
- Elecziun da Boris Caduff dalla firma Grünenfelder e Partner SA a Domat scu nov geometer-revisour pigl Cumegn da Surses. El succeda a Thomas Grünenfelder, tgi vign pensiuno la fegn digl onn.

Ovras communalas incl. infrastruttura turistica, economia forestala

- Surdo las lavours da mantignamaint da divers bike-trails an Surses a Roland Kolb. La cunvagnientscha vala per igl onn 2021.